



Te Arae Tiunu 1960

TE HEHEURAA API

Te Parau a te Peropheta i te Feia Api

Te A'oraa teie a te Peropheta O Davida O. Make i te Feia Api o te Ekalesia e 10,000 e tiahapa te rahiraa tei tairuru i roto i te Fare Menemene i Roto Miti, i Utaha, i te 3 no Tenuare, 1960, e o tei faaroo atoa hia i taua mahana ihora e te tahi atu â mau pūpū feia api na roto i te faanahoraa radio, (ia amuihia ana'e te mau feia api o tei faaroo i taua a'oraa nei e roaa ia e 200,000 taata.)

Te ua o maira te re'o o te Peropheta e, "*Aita vau i ite i te hoé ravea no te haapao-maitai-raa i te evanelia, o tei hau atu i te mea ta'u e paraparau atu ia outou i teie nei po, oia hoi, te faaipoiporaa, e te mau ohipa faaineineraa i te taata no te reira ohipa. A paraparau ai tatou i teie po, a haamana'o maitai ana'e tatou e, i te taime a hamani hia ai te taata i te pae tino nei, ua faaroohia te re'o i te parauraa i te parau faaite mure-ore, i te na o ra e, "NA OE IHO E MAITI."* E no reira farii ihora te taata nei i te hoé tao'a aroha no ô mai i te Atua ra, oia hoi, TE TIAMARAA. E ua tae atoa mai te faaueraa ia haapao-maitai-hia te reira. E no reira, te parau atu nei au ia outou paatoa e, "*O Oe te taata te tia ia maiti, e rave anei oe e aore ra e faarue atu. O oe hoi te taata te haapapu i to oe mana'o, e aratai anei oe, e aore ra, e faataupupu noa i muri, e titau anei oe i te rê i te atea ê, e aore ra e maururu noa anei oe i te faaea noa i te vahi ta oe e parahi nei i teie nei.*" (Na te rohi pehe ra, O Guest teie i papai.)

I roto i te Buka Fafau, te faaite papu mai nei te Fatu i te faufaa rahi no te faaipoiporaa: "*E te parau faahou atu nei â vau ia outou na e, Oia mau, ua haapaohia te faaipoiporaa e te Atua no te taata nei.*" E no reira e ere teie i te oro'a e tia ia tomo oioi-noa-hia e te taata ma te feruri-ore, e aore ra ia faaore-noa-hia no te mau hinaaro tia ore. E ere atoa te

reira i te tahoéraa te tia ia haapararihia i te peapea matamua te tupu mai. I roto i te feruriraa o te mau melo o te ekalesia i faahoi hia mai, e oroa mo'a te faaipoiporaa, e ia faaterehia e na taata faaipoipo tei riro ei na metua maramarama, o te ravea hau ia e te papu no te haamaitaraa i te taata nei. A parau ai Iesu no te faaipoiporaa, ua haapii mai Oia i te fau-faa rahi e te tiaraa teitei hoi o teie nei oro'a, i te na ô raa e, "*E ta te Atua i taati ra, eiaha te taata e faataa ê atu.*" E mea hinaarohia te faaipoiporaa e te rahiraa o te mau taata atoa. I roto i te hoé mau taimé e hi'o ihoa te mau taata apî i mua i te taimé e oti ai teie ohipa. Eiaha ia moe ia tatou te parau e, ua riro te utuafare ei tumu no te oraraa fana'o, e te faahiahia, e e mea tia hoi ia faatupu te mau melo o te ekalesia nei i te hoé mau utuafare o tei hau i te maitai, tei riro ei hoho'a e ei hi'oraa maitai roa. E no reira, no te haamaramarama i te huru no teie nei titauroa i nia i te mau melo o te ekalesia, e faaite atu ia vau i na ohipa e pae o te tauturu i te faatupuraa i te hau e te manuia i roto i te utuafare o na hoa faaipoipo ra.

I. TE ROO MAITAI E TE MA HOI.

E mea tia ia haamata i te mau ohipa faaineineraa no te faaipoiporaa manuia maitai na mua roa i te mahana oe e faaipoipohia'i. E haamata teie faaineineraa i to oe apîraa, a faarii ai oe i te tahi mau aniraa ia amui oe i roto i te mau ohipa arearearaa tei matauhia e te feia apî. E haamata'toa teie faaineineraa na roto i te huru o te mau peu ta oe e rave a haamata ai oe i te here atu i te hoé taata, e a haere ai oe na muri iho ia'na, e i te mau taimé, a vaiiho hia'i orua ana'e. Na roto i te tapea-maitai-raa i to oe roo maitai e te mâ hoi, a haamata ai oe i te here atu i te hoé tamaiti e aore ra i te hoé tamahine, e tia'i ia oe i te patu i te tiaraa papu maitai no te hoé utuafare oaoa roa. Ua itehia e, e parau mau roa teie, na roto i te hoé mau ohipa tei tupu i te hoé na potii apî, ia

au i ta raua iho i faatia mai. Te na ô mai nei te hoê o taua na potii ra e, "*A vai taurearea noa'i au, e mea huru tapitapi roa to'u mana'o no te mea, e rave rahi te mau faahemaraa e te mau haafifiraa tei tupu roa mai i te taime hoê. Te hoê o taua mau haafifiraa ra, o tei haapeapea roa i to'u ra mana'o, o te mau aniraa ia a te hoê mau tamaiti, no te haere atu na muri iho ia ratou i te hoê mau ohipa mai te cinema e te piquenique te huru. No te rahiraa o te mau mana'o tei huru ê te tahi i te tahi no nia i taua ohipa nei, ua anoi-noa to'u mau mana'o. Tera râ, ua pau hoê matahiti e te afa i teie nei i to'u haereraa na muri iho i te hoê mau tamaiti i tera mau ohipa, e ua roaa ia'u te mau ite e rave rahi no nia iho i taua mau ohipa ra. Ua mana'o vau e, e mea maitaia tapea atu vau i to'u here i te mau tamaiti atoa, e tae noa'tu i te taime e farerei atu ai au i te tane ta'u e faaipoipo atu. Area ra, ua patoi roa mai te tahi o to'u mau hoa i teie nei mana'o to'u, ma te faaite roa mai ia'u e, "*E taata ê roa oe.*" Te oto nei hoi au i te mau mea e rave rahi ta ratou i parau mai, e ua haamata vau i te feruri e, ua hape paha te tahi o to'u mau mana'o. Tera râ, e mea fatata te rahiraa o tatou tei tahoéhia no nia i te mana'o e, e mea hape ia parahi noa te tane e te vahine, tei ore i faaipoipohia, ma te here noa no te hoê taime maoro. E patoi roa vau i te reira ohipa. Tera ra, te faaite mai nei ratou ia'u e, i muri iho i to te hoê tamaiti afai-pinepine-raa ia'u i te hoê mau ohipa no te faanaana-tae maitairaa ia'u, e mea tia ia ia'u ia faaite atu i to'u manuruu ia'na na roto i te aparaa'tu ia'na. Aita roa vau i mana'o e, na tia te reira mana'o. E no reira, ua inoino roa mai te tahi mau tamaiti ia'u ma te mana'o e, aita vau e au ia ratou, e no reira aita ratou e ani faahou ia'u no te haere na muri iho ia ratou. Ia farerei râ vau i te tane te tia ia'u ia faaipoipo, e hinaaro ia vau i te horoa'tu i te taatoaraa o to'u here ia'na. E te tiaturi nei au e, e rahi a'e te faufaa o te here ia ore au ia here noa i te mau tamaiti atoa." Te hopea*

te reira o te parau a te potii matamua. Aita râ te piti o teie na potii i tiaturi e, e mea tia ia'na ia tapea i to'na here no te tane ta'na e faaipoipo. Ua mana'o ra oia e, e au mai te mau taurearea ia'na, mai te mea e faatia oia i to ratou mau hinaaro-tia-ore. E potii nehehehe roa hoi oia, o tei ite i te faanehehehe ia'na iho. E mea varavara oia i te ere i te mau aniraa ia haere i te mau ohipa rii mai te cinema e te pique-nique te huru. Tera ra, te tae mai ra, e te reva'tura hoi te mau tamaiti, i te mau taime atoa, mai te are miti te huru, e te tau-noa-hia nei to'na mau hoa, e aita roa'tu to'na e hoa papu. Te ani noa nei te mau tamaiti ia'na ia haere na muri iho ia ratou no te hoê noa iho tumu, maori ra, no te mea ua ite ratou e, ua tui to'na roo no to'na patoi-ore-raa i te mau aniraa tia ore a te mau tamaiti o tei opua i te mau ohipa ino. Ia itehia ana'e te hoê tamaiti i pihaiho i taua tamahine ra, e tupu te mana'o o te mau taata e, e taata taua tamaiti ra tei ite i te ohipa here i te vahine, e ua matau oia i te mau peu o te reira mau ohipa. Aita râ te mau tamaiti i tamau i te ani ia'na ia haere na muri iho ia ratou, maori ra, aita ia ratou i ite i te hoê tamahine papu tei riro ei tamahine tei tia ia tiaturihia te ore hoi e riro ohie-noa'tu ia yetahi ê.

E no reira ua faarue oioi noa te mau tamaiti i teie nei potii nehehehe, a ite atu ai ratou i te hoê tamahine papu, no te mea noa'tu e ere te tahī mau vahine i te mea nehehehe roa mai ia'na - e faarue noa te mau tamaiti ia'na no te hoê tamahine te ore e ori noa na muri iho i te mau tamaiti ma te faatia i to ratou mau hinaaro tia ore. Te vai ra te mau taata o te faaoo i te taata tei hinaaro i te tapea i to'na roo maitai, na roto i te vai tiama noa e i te haapae-roa i te mau ohipa here e tae noa'tu i to'na faaipoiporaahia'tu. Tera ra, e tao'a faahiahia mau te roo maitai. Tei ia oe te maitiraa. Aita hoi te pae rahi o te mau tamaiti e rave ino i te hoê tamahine, ta ratou i here mau.

II. E Ohipa Tia na te Mau Taata Apî ia Amui Maitai I Rotopu i to Ratou Mau Hoa.

Te piti o na ohipa faufaa ra, o te maitiraa ia i te hoé hoa au maitai no oe. E ohipa tia roa, e te faufaa rahi hoi, te maitiraa i te hoé hoa au maitai. I roto i te mau taima a haamata ai te mau tamaiti e te mau tamahine i te here te tahi i te tahi, e mea tia roa ia ratou ia amui maitai atu te tabi i te tahi, ma te haamatau maitai i te huru no tera taata e tera taata. Te mau tamahine o tei an i te mau ohipa himene, e o tei haapîi i te faatai i te tahi o te mau upaupa e rave rahi e aore râ o tei au i te mau reo himene noa, e hau atu ia te manuïa o te reira huru tamahine i roto i te imiraa i te hoa maitai i te tahi tamahine o tei faaea noa i te fare no to'na hinaaro-ore ia tomo i roto i te mau ohipa maitai a te taata nei. E hau atu hoi te manuïa o tana imiraa ra i te hoa au maitai ra o te hoé tamaiti o tei tomo i roto i te mau ohipa "sport" i te tahi tamaiti o tei faaea noa i te fare ia faaroo noa i te radio e aore ra ia faatai noa i te guitare. Oia hoi, e ravea maitai roa te amuiraa'tu te tabi i te tahi no te faaine-ineraa ia oe iho no te hoé faaipoiporaa o te hau i te maitai e te oaoa, no te mea, i reira te feia apî e haamatau ai te tahi i te tahi, e e hau atu ia to ratou ravea no te maitiraa i te hoé hoa maitai. I teie nei ra, e te feia apî e, a faatia mai ia'u ia faaara'tu ia outou no te ino o te haamatauraa i to outou apîraa i te tamau noa i te haere na muri iho i te hoé noa iho tamaitie aore ra i te hoé noa iho tamahine. Oia mau, e noaa i te mau tamahine te papuraa e, eita ratou e ore i te anihia ia haere i tera ohipa e tera ohipa, mai te mea e hoa tamau to ratou, e e riro paha te reira ei haapapuraa no to rana tahoéraa i roto i te faaipoiporaa i te pae hopea, tera râ, ua rahi roa te mau haafifiraa i roto i te tamau noa raa i te haere na muri iho i te hoé noa iho taata, i to oe apî-roa-raa tei ore roa e tia ia faataehia i nia iho i te mau taata apî tei itoito i te tiaturiraa i te mau ohipa maitai. Tera mai te tahi o tana mau ino ra:

A Tahi: E mea oioi roa te mau taata apî i te topa i roto i te here, e no te paari-ore o to ratou mau mana'o, aita e tia ia ratou ia faataa maitai atu i na huru here e piti te tahi i te tahi. Teie taua na huru here e piti ra. Oia hoi.

1. Te riro noa raa te mana'o e te hinaaro i te hoé taata.
2. Te faahiahia man i te maitai o te hoé taata e te here man ia'na.

A Piti: Te tapea nei teie nei peu, (oia hoi te tamau i te haere na muri iho i te hoê noa iho taata) i te mau ravea a te mau tamaiti e te mau tamahine ia haamatau maitai atu ratou te tahi i te tahi. Oia hoi: ia tamau noa oe i te ori i te hoé noa iho taata e tae noa'tu i te faaotiraa o te oriraa, te tapea nei ia te reira huru peu i te faufaa rahi no te arearea-raa. Tera râ, te mea ino roa'tu i roto i te tamauraa i taua peu nei i to oe apiraa, o te noaaraa ia te mana'o i te tane e, e auraa fetii to'na i teie vahine, e aore râ, o oia ana'e te fatu no teie vahine. E e noaa atoa ia te mana'o i te vahine e, o tera tane iho â ia to'na fatu. E na mana'o maitai e te faahiahia hoi teie, aita râ e tia ia faatupuhia te reira na mana'o, maori ra, na roto i te fafauraa no te oro'a faaipoipo. Ia tamata hia râ, taua na mana'o oaoa ra, e te mau taata apî, na roto i to ratou mana'o puai tei ore i haavibia, e riro ia te reira mai te hoé maa pi tei pafaihia hou to'na tau e para'i, e mea avaava roa ia, e aita hoi to'na e auraa mau mai tei itehia i roto i te faaipoiporaa. Te vai ra paha te mahana e ite ai rana e, ua hape to rana maitiraa te tahi i te tahi, na roto i to rana ruraa e to rana onoonoraa ia tamata i te hoê ohipa hou to'na tau mau. A haamana'o maite na e, na muri i te tamariiraa, te vai mau ra te tahi atu mau titauraa i nia iho i te mau "taurearea", tei taa ê atu i te imi noa i te hoé hoa here, e aore ra i te imi noa i te ravea ia "areaerea maitai." Oia hoi, e na mua roa oia i te haapapu i te mau peu ta'na e hinaaro i te tamau i roto i to'na oraraa.

E e mea tia'toa ia'na ia haapapu i te toro'a imiraa moni ta'na e maiti. E ia tae i te taime no te maitiraa i te hoé vahine, e ia hinaaro ana'e oia ia na reira, ua tia roa ia'na ia haapapu atu e, nafea oia i te haapao ia'na e i te mau tamarii. Na roto i to te hoé na taurearea tamau noa raa i te haere na muri iho te tahi i te tahi, e moe ê roa paha ia raua teie mau titauraa i nia iho ia raua, e e mea iti roa paha to raua feruriraa nō nia i taua mau titauraa ra.

III. Te Mo'araa o te Hoê Fafauraa

Te toru o na ohipa faufaa rahi ta'u e faahiti no te faa-tupuraa i te manuia i roto i te oraraa o na taata faaipoipo, e haamata ia i te taime a tomo ai raua i roto i te oro'a no te faaipoipo, ma te fafau tataihoé te tahi i te tahi e, e haapao raua te tahi i te tahi. Ua rahi atoa hoi te mana o te parau a te hoé taata parau-tia mau i te papairaa i te i'oa i nia iho i te hoé parau, no te mea, ua riro te parau a te taata parau-tia mau ei tapa'o o tei tia ia tiaturihia i te mau taime atoa e i te mau vahi atoa.

E no reira, hoê â huru te fafauraa o te faaipoiporaa, e mana rahi roa to te reira. Ua hope hoi te mana o te reira i to te hoé na taata tomoraa i roto i te Fare o te Atua, no te faaotiraa i te reira oro'a, ei faaiteraa e, ua tiamâ raua, e ua au maitai rana te tahi i te tahi. E ite hoi taua tamahine apî ra e, ua aifaito te auraa o te taata ta'na e horoa nei ia'na iho, i te ohipa a te hoé metua tane, e to'na iho auraa i te ohipa a te hoé metua vahine, e ua tia ia'na ia mana'o i te reira. Aita roa ta raua e haamana'oraa i te hoé a'e ohipa ta raua i rave tei au i te ohipa a te tahi tamaiti "puhara tao'a." E mea faahiahia mau hoi te iteraa e, ua riro roa raua te tahi i te tahi. E noaa na roto i te faaipoiporaa te ravea ia tauturu rana te tahi i te tahi i te hereraa'tu i te tamarii e te haapao-raa ia ratou, o te tumu matamua roa hoi te reira no te faaearaa o na hoa faaipoipo ra. Ia ore ana'e te tamarii, e

aore ra, te tiaturiraa e, e faufaa rahi to te tamarii, ua faufaa-ore roa te faaeearaa o na taata faaipoipo ra. Oia mau, e pau te taime i te tamarii, e e haapeapea mai ratou ia oe, e e titauphia te huru faaoromai rahi roa te ore paha e noaa ia oe i te tahi mau taime, e e tapea rii hoi ratou i ta oe tiama-raa ia rave i te mau mea ta oe i hinaaro, mai te mau ohipa arearea, e te tahi atu â mau mea te titauphia nei i roto i te oraraa pae tino nei. Tera râ, te tamarii ra, o te tumu mau ia ratou no te tahoéraahia o te tane e te vahine. Ia ore tatou ia haamana'o i te faufaa mau no te ohipa a te hoé metua, aita roa ia i ravai to tatou faaineine raa i te paeau o te feruriraa e te paeau o te amuiraa i rotopu i te mau taata, e tia'i ia tatou ia tomo i roto i te faaipoiporaa. E te mau taata apî e, E tahoéaraa te faaipoiporaa o te ore na roto i te nounou, te faaoromai ore, te faaheporaa, te faaherehere raa i te hoé noa iho pae, e te faatura-ore. E tahoéaraa hoi te faaipoiporaa o te ruperupe na roto i te faariiraa, te autahoéaraa, te opere-aifaito-raa i te here i nia i te taatoaraa, te horoaraa'tu, te tautururaa, te amcraa i ta oe tuhaa, e te haapiiraa e te arearearaa i pihai iho noa te tahi i te tahi. E faaite mai to te hoé taata ofatiraa i te fafau o te faaipoiporaa, e aita e tia i te taata ia tiaturi ia'na. Te mana'o nei tatou e, e mea faahiahia mau ia herehia tatou e te mau taata. Tera râ, e mea hau roa'tu ia ia tiaturihia tatou. A tamau maite na i te parau e, e riro te fafau ta oe e fafau ra, ei faatupuraa i te oaoa i roto i te faaeearaa te tane e te vahine faaipoipo. No reira, tei ia tatou i teie nei, teie na ohipa tia no te oraraa fana'o i roto i te faaipoiporaa, oia hoi:

- (1) Te Roo Maitai
- (2) Te hoé hoa au Maitai
- (3) Te haapaoraa i te Fafau o te Oro'a Faaipoiporaa

IV. Te Faatereraa ia Oe iho

Te maha o na ohipa faufaa no te faatupuraa i te fana'o e te oaoa i roto i te faaearaa o na hoa faaipoipo ra, o te faatereraa ia a te taata ia'ua iho, i roto i te utuafare. I roto i te tau, a haamatau ai te hoé taata i te mau taata apî, ma te imi i te hoé hoa papu maitai, e mea tia ia'ua ia hi'opoa maitai i te mau peu rii atoa o tera taata e tera taata, eiaha ia hape i te maitiraa ra, Tera râ, ia oti ana'e oia i te faaipoipohia i te hoé taata, e mea tia ia ia faaea i reira i te hi'opoa i te mau peu rii o to'na hoa. E no reira, ia hi'opoa noa ana'e na hoa faaipoipo te tahi i te tahi, e tupu iho â te ohumuraa, E na te reira e faaore i te oaoa i roto i to raua utuafare. Ua ite te taata paari i te faatere i to'na arero.

No te mea mai teie te hurn, Ia tuu ana'e te tamarî i ta'na paûma i nia i te atea e nehehe ia'ua ia huti faahou mai i te reira. Tera râ, ia tuu ana'e oe i te hoé parau i rapae au i to oe vaha, aita ia e tia ia oe i te huti faahou mai i te reira. Mai te mea e, ua feruri noa oe i te hoé parau, e aita ia oe i parau atura. E ere ia i te mea fifi roa. Ia tuuhia ana'e râ, te hoé parau, aita ia e tia ia faa ho'i faahou mai i te reira. Eiaha e faahiti i te parau ohumu. E mea maitai a'e ia haere noa i rapae au i te fare. Ua faaroo vau i te aamu no te hoé na taata o tei ore roa i tama'i te tahi i te tahi, no te mea ua faaotihia e raua e, ia riri ana'e te hoé, e haere ia oia i rapae ia ori haere rii. Ua haapau hoi te tane i te rahiraa o ta'na ra taine i te ori-haere noa. I roto i teie nei upoo parau, oia hoi, te faatereraa ia tatou iho, ua riro te puhipuhiraa i te ava'ava, e te tapea-ore i te biaai i te mau inuraa taero, ei tumu rahi no te monoraahia o te oto i te oaoa i roto i te mau utuafare, e no te monoraahia o te mau ati i te manuia i roto i te oraraa o te tahi mau taata. I roto i te tau faaineineraa no te faaipoiporaa, e i roto atca i te taine, ua oti oe i te faaipoipohia. Eiaha e tamata i te ava'ava, e aore râ i te mau inuraa puai.

V. Te Faatura.

Te pae o'na ohipa faufaa ta'u e faaite atu, o te faatura ia. I roto i te tau, a haamatau ai te mau tamaiti e te mau tamahine te tahi i te tahi, e mea huru faatura iho à ratou te tahi i te tahi, na roto ra i to ratou tapaparaa i te hoé hoa, ma te oaoa hoi na roto i te tamata i te tohu i te mau mea ta te hoa e hinaaro, i tera taime e tera taime e i roto i te paeau o te mau peu mâ, e oaoa hoi ratou ia faatia i taua mau hinaaro ra. Ua rahi roa râ te mau taata o te mana'o nei e, ua riro te faaotiraa i te fafauraa i roto i te oro'a o te faaipoiporaa ei faahoperaa i te tau e tia'i i na hoa faaipoipo ia faahiahia te tahi i te tahi na roto i te faatura e te hamani maitai. Te mea tia râ, maori ra, ia riro te oro'a faaipoiporaa ei haamataraa no te hoé tau mure-ore, no te haapao-tamau-raa i te faatura i te vahine, i roto i te utuafare, mai te au hoi i ta'na i faaturahia a vai hoa here noa'i oia, hou te faaipoiporaa. Oia atoa, e tau to te faatura i te tane, noa'tu e aita oia i faarahi mai i te paraparau i te tahi mau taime mai ta'na i na reira i te matamua. Oia, e huru haumani ihoa te oraraa i te tahi mau taime, tera ra, e ore te haumani, mai te mea e haamana'o tatou e, e mea tia roa ia faatura noa tatou i to tatou mau hoa faaipoipo na muri a'e i te faaipoiporaa, eiaba i te taime ana'e ta tatou i tapapa ia'na ia riro mai oia ei hoa here no tatou. I roto i te utuafare, tei haamaitahia na roto i to te Atua horoaraa mai i te tamarii, e tamau te mau tamarii i te mau peu o te faatura, ia ite ana'e ratou i te metua tane i te faaturaa'tu i te metua vahine, e te metua vahine hoi i te faaturaraa'tu i te metua tane. E e riro ia ratou ei mau tamarii tei ite i te mau peu maitai, no te mea te tumu rahi roa no te mau peu maitai mau, o te faaturaraa ia i te mau hinaaro o vetahi ê. Eiaha ia moe ia outou e, ia tupu te mau tau fifi, e ia rahi te mau tarahu tei ore i pee hia, e ua tia ia faana i te aia, e ia faamu atoa paha ia'na i te titi i te po, ua riro mau te faatura i muri iho i te otiraa o te oro'a faaipoiporaa ei faatupuraa i te hau i roto i te utuafare. Aita'tu

e mea tano no te hoé tane maitai mau, tei hau atu i te faatura e te faaoromai. Ia faaotihia i roto i te utuafare te parau e, e tupu te hoé ohipa i te hoé taime, a faatura i ta oe vahine e ta oe mau tamarii na roto i te haapaoraa i te taime tei faataahia. Ia tafifihia râ oe, e te tahi mau ohipa tia roa ta oe, eiaha ia moe ia oe ia ani ia ratou ia faaore i ta oe faahaperaa i te mea tei parauhia, ma te faaite-baamaramarama-atu ia ratou i te tumu oe i mairi ai. Ua riro te reira pen ei ohipa tia roa ia haapaohia na muri i te otiraa o te oro'a faaipoiporaa, no te faatupuraa i te hoé utuafare oaoa. Te faacti nei au i ta'u nei a'oraa, na roto i te horoa'tu ia outon i te hoé hi'oraa poto noa i te faufaa e te auraa hoi no te hoé oro'a faaipoipo o tei hope i te maitai e te afaro. Tei roto i te aau o te tane a tomo ai oia i roto i taua oro'a ra, te tao'a faahiahia roa'e tei tia ia roaa ia'na, oia hoi te papuraa e, ua mâ te vahine tei tapea mai i te rima o taua tamaiti ra, ei tapa'o no to'na tiaturiraa, e ua mâ hoi oia mai tei au i te hoé hibi mahana, o tei ore i tafetafeta mai te hiona topa apî tei hope i te uouo. Ua papu hoi ia'na e, i roto i to teie vahine huru porao ore e te aau maru e itehia te hoho'a mau no te toro'a mo'a o te metua vahine. E teie nei, e te mau tamaiti apî e, faaite mai na, e ere anei te reira papuraa, e te reira tiaturiroa-raa i te hoé tac'a o tei aifaito to'na faufaa i te taatoaraa o te mau mea o teie nei ao? E hoé â hoi te faahiahia o te papuraa e noaa i te vahine, tei faaite mai ia'na ra e, te haere mai nei teie tane ta'na i here e ta'ua i horoa'tu ia'na iho i roto i te faaipoiporaa, na roto i te mâ e te papu o te natua parau-tia o tei aifaito i ta te vahine e hopoi nei i mua i te tane. E riro te reira tahoéraa ei faaipoiporaa tei faataahia e te Atua no te faahanahanaraa i ta'na i hamani. E no reira to outou teie faufaa, e te feia apî e, a feruri ai outou no te tahoéraa-mure-ore, e te pure nei au ia noaa te reira ia outou, ia ite hoi outou i te oaoa mau e te fana'o o teie rê tei hinaaro-roa-hia na roto i te I'oa o Iesu Mesia Amene.

Faaauhia ei re'o Tahiti e Timi Orometua

Te Fenua TAMARU Pererau

E tuatiraa.

U. Eaha te tumu te mōu ve'a i tonohia'i i te mau fenua i purarāa ê?

P. No te mea e taata to nia iho i taua mau fenua nei.

U. O vai iā taua mau fenua i purarāa ê ra?

P. O teie ia mau fenua i roto i te moana Patitifa, o tei parauhia Porinetia Asiatia, e motu i Papua e tae atu i Matuita, oia hoi, Nukahiva, e tae roa'tu i Rapanui, e ua tai'o atoahia to tatou mau fenua i teie nei tai'oraa, te pae Tuamotu, e Tubuai ma, e Raiatea ma.

U. No fea mai hoi te mau taata i nia iho i teie nei mau fenua rii i parauhia nei?

P. No te fenua Tamaru Pererau mai hoi ratou. O te reira te tumu no teie tohuraa maoro a Isaia i te matahiti 714, hou Iesu. Isaia 18: 1-2.

U. No tei hea nunaa, e no tei hea opu mai hoi ratou?

P. No te nunaa Iseraela, e no te opu o Iosepha, a Iakoba, a Isaata a Abelahama hoi ratou. Exodo 3:15. I te matahiti e 600 hou Iesu, ua reva teie nei taata o Lehi e to'na utuafare, e o Isemaela e to'na utuafare atoa, i te hoê fenua o tei parauhia to'na i'oa i taua tau ra, (TE FENUA I PARAUHIA) Teie nei na taata no roto mai raua i te huai o Iosepha, tai'o I Nephi 5:14. O teie to'na tai'oraa e, *E ua ite atoa to'u metua ra o Lehi e, tei nia iho i te mau api veo ra te aufau fetii o to'na ra mau metua, i ite ai oia e, e huaai oia no Iosepha; oia hoi, o Iosepha a Iakoba tei hoohia i Aiphiti ra, e o tei faaorahia e te rima o te Fatu ra, ia tia ia'na ia faaora i to'na ra metua ia Iakoba, e to'na utuafare atoa i te o'e pohe ra.*

Te ite nei tatou e, no tei hea nunaa e tei hea opu mai te mau taata matamua i nia iho i teie nei fenua i parauhia nei, oia hoi, te fenua Tamaru Pererau, no te opu o Iosepha, no Iseraela iā ratou, e ua tupu ratou i taua fenua nei ei nunaa rahi e te puai, te maororaa o to ratou parahiraa i taua fenua ra, e 557 matahiti iā. A taio i roto i te Mosia 29:46, teie te taioraa. "E ua pohe atoa i hora Mosia i te toru ahuru e te toru tiahapa o to'na ra ariiraa, o te ono ahururaa iā e te toru tiahapa o to'na ra matahiti, e ia amui-atoa-hia, e pae hanere iā e aore ahuru ma iva matahiti mai te tau i reva mai ai Lehi mai Ierusalema ra." A taio atoa i te Alama 63:5-8, teie to'na taioraa. "E i te matahiti e toru ahuru ma vau i hamani ai taua taata nei i te tahi atu ā mau Pahi, ia amuihia te m. 519 e te m. 38, e tae mai iā i te m. e 557. Oia te taata tei hamani i teie nei mau Pahi o Hagota, ua hamani teie taata i teie nei mau Pahi no te faauta i te mau taata i te pae apatoerau i taua fenua nei, oia hoi, o America I Nia te i'oa o teie tau, no te mea tei te pae apatoa ratou, oia hoi, i te pae raro o taua fenua nei, ua tere te Pahi matamua e te mau taata i nia e ua tae e ua hoi faahou i raro e

ua hamani faahou oia ia rahi te Pahi e ua faai i te taata e te mauhuru hue-ro raau maa atoa. E ua tere faahou i te pae i apatoerau, e aita i tae e ua moe roa. Ua mana'ohia i taua tau ra e ua paremo i raro i te moana. Oia mau anei? E hi'o rii tatou i teie nei i te mau huru e vai nei. E te vahitara-tou i faarue i to ratou tere i te apatoerau ra, o Desolationa te i'oa o taua vahi ra i taua tau ra. I teie nei tau o Peru ia te i'oa o taua vahi ra i teie nei mahana. Ua ite papu mau te haapiiraa e, aita taua mau Pahi ra i moe. O te tumu mau ra ia te reira no te mau taata, o teie nei mau fenua i purara e mai e mahere e 43 matahiti hou to Iesu fanauraa no teie nei tere. Eaba te hoê mau tapao faaite no te reira? Teie te hoê tapao: ua haapiinu mai te paepae Kon-Tiki na Peru mai e ua tae i teie pae Porinetia i Raroia i te m. 1947. Te piti o te tapao faahiahia, o te Peritome ia. I to te mau Popaa matamua taeraa mai i teie nei mau fenua te vai mau nei te Peritome i nia iho i te maohi nei. Ua parau mai o Iehova ia Aberahama a peritome i ta oe mau tamaroa, Genese 17:9-12. No reira te ite nei tatou e, aita taua mau Pahi ra i moe o tatou ia taua mau taata i nia i taua mau Pahi nei, nunaa Iseraela mau no te Opu o Iosepha. Te na ô maira te haamaitairaa o Iosepha:

O Iosepha ra, e ohi hotu ia, e ohi hotu i te pu o te pape ra; o tei toro to'na amaa na nia iho i te aua ra. Genese 49:22.

U. O vai te ohi hotu?

P. O Iosepha ia.

U. O vai te pu o te pape?

P. O te Atua mana hope ia.

U. O vai te amaa o tei toro?

P. O to'na ia huaai.

U. O vai te aua?

P. O te moana ia i ropu ia Ierusalem a te fenua Tamaru Pererau o America.

I ropu hoi i America e Porinetia nei, te parau atu nei teie haapiiraa e, e nunaa Iseraela tatou no te opu o Iosepha.

Tuatiraa

Marurai â Mahuru.

PARAU RII API

Te Misioni i Farani Ma.

I roto i na ava'e matamua e pae o teie matahiti 1960, ua baptizohia e 220 taata apî i roto i te misioni i Farani, e te tiaturi nei te mau taata faatere o taua misioni ra e, e noaa ia ratou e 400 baptizoraa hou te ava'e Tiurai. Te faatae nei te Fatu i to'ua ra varua i nia i te mau taata i Europa ma, e te haere nei te ekalesia i mua i reira. Te noaa nei te rahiraa o teie mau baptizoraa na roto i te tantururaa a te mau melo o te ekalesia o te faaite nei i te mau orometua i te mau i'oa o to ratou mau fetii e to ratou mau hoa e to ratou mau taata tupu o te imi nei i te parau mau o te evanelia. Te rave nei

te mau misioni i Europa ma i te parau ra, "EMANUELA," ei parau tumu no ta ratou poro-haere-raa i te evanelia. Tera te auraa no teie nei parau, oia hoi, "*Tei pihai iho te Atua ia tatou*," E oia mau, ia rave ana'e tatou i ta'na ohipa, tei pihai iho mau â Oia ia tatou nei.

E Parau Haamaramarama i te Mau Melo o te Ekalesia; Te Huru Teie o te Mau Ohipa a te Ekalesia i te Otiraa o te Matahiti 1959.

Te numera o te mau misioni i tera fenua e tera fenua	50
Te numera o te mau amaa i te ao taatoa nei.	2,614
Te meloraa o te ekalesia taatoa (i te 31 no Ditema)	1,616,088
Te numera o te mau tamarii tei haamaitaihia i te i te otiraa o te matahiti 1959	53,399
Te numera o te mau tamarii i baptizohia i taua taime ra	39,201
Te numera o te mau taata i faafariuhia mai tei baptizohia.	33,060
Te numera o te mau oro'a tei ravehia i roto i te mau hiero no te mau taata te ora nei,	37,088
no te feia i pohe ra.	3,376,533
Te numera o te mau pipi i roto i te mau fare haapiiraa a te ekalesia, te mau haapiiraa teitei (Colleges).	25,054
i roto i te mau haapiiraa i raro iho	55,624
Te numera o te mau misionare poro-haere i te evanelia i roto i te mau misioni.	13,767

To Tatou Orometua ApĪ.

I te mau mahana matamua o te ava'e Me, na tae mai te ho'e orometua apĪ na nia i te manu reva T.A.I. na Farani mai. O Jerry (Terii) Curtis to'na io'a. Ua faaea oia i Farani

e piti matabiti e te afa. To'na haereraa matamua i reira, e mea na roto ia i te nuu faehau, te piti ra, to'na ia maitiraa-hia ei misionare no te misioni i Farani. Na roto i to'na ra faaeearaa i reira, noaa atura ia'na te ite papu i te re'o Farani. Ua faatere oia i te mau ohipa i Farani no te mau melo o te ekalesia i roto i te faehau i reira. Ua rave atoa oia i te toro'a haapao faufaa no taua misioni ra. I teie nei, ua maitihia oia ei orometua no Polinetia Farani nei. E taata aravihi oia i te paeau no te ohipa himene, e te haapiiraa evanelia atoa hoi, e no reira, tera te parau e au, maori ra, ia ora na oe, e teie nei orometua apî i te aroha mau o te Fatu!

Te Hoho'a No Ta Tatou Ve'a. Te Pupu Haapiiraa Sabati no te Mau Tamarîi.

Te hoé mau tamarîi teie i roto i ta ratou pupu no te Haapiiraa Sabati. I roto i taua pupu ra te haapii nei ratou i te mau haapiiraa rii o te evanelia, ei tautururaa ia ratou ia mau maite ratou i roto i te mau ohipa ma e te nehenehe hoi. E rave ratou i te oro'a o te pane e te pape ei tapa'o no to ratou huru viivii-ore, ia au i ta Iesu i parau i te na ô raa e, "*A tuu noa mai i te tamarîi rii, ia haere noa mai ia'u nei... mai ia ratou hoi to te Basileia o te Atua ra.*" Mareko 10:14.